

## Taetas Nægkiariien sə rani mə nəfe i nəkukuə

Taetas in riti nəha Pol. Iasitu riti səvəi Pol. Nəp̄in nepw̄in in ramavən irau Pol. Nakalasia me fwe tənə əmweris riti kani mə Krit, Taetas in iəmə asori riti səvənraha. Nəkukuə i rəmwhen ia nəkukuə mi səvəi Timoti. Nakalasia me fwe Krit həpkukurən amasan mhə noien səvəi nəfwakiien t̄i nəri nə mə irəha həkvehe vi a mhahatətə ia Kristo. Ro pen iərmama traməkeikei mevən masitu ia nirəha. Pol r̄ini pen t̄i Taetas mine nakalasia me fwe ikin mə tuhəfarə irə. Pol r̄ini pen t̄i Taetas mə trahatən irəha ia n̄ipərhiien. In rahatən mwi Taetas ia niriien nakalasia me.

### *Pol ramrai nəkukuə i m Taetas*

<sup>1</sup> Iou Pol, iou iərmama riti sə iakamo tukwini nari m Kumwesən, nənə iou aposol riti səvəi Iesu Kristo. In rərhi pen iou mə takasitu ia nərmama me səməme Kumwesən ruvər̄fi raka irəha. In rokeikei mə takasitu ia nirəha ia nahatətəien səvənraha, nənə masitu mwi ia nirəha mə tuhəukurən nəgkiariien pərhiien sə ramahatən noien me Kumwesən rokeikei.

<sup>2</sup> In rərhi pen iou mə takasitu ia nirəha pwəh həmri pen əknek̄in nətəriḡien səvənraha ia n̄im̄iruien rer̄in. Fwe tui, nəp̄in t̄iprənə ramiwən ihi, Kumwesən sə r̄ipkeikuə mhə ruvəni raka mə truvei pen n̄im̄iruien rer̄in nəha minraha,

<sup>3</sup> nənə ia nəpɪn atukwatukw səvənhi in ro pui nɪmɪruien nəha ia nəgkiariien səvənhi. Kumwesən sə rauvehimɪru kitaha rəmri pehe nəgkiariien nəha ia rəgɪk mɪni nəkwən mə takəvisau irapw irə.

<sup>4</sup> Nəkukuə i rauvehe tukw ik Taetas. Ia nahatətəien səkrau ikəmwhen ia nərik pərhiən. Pwəh Kumwesən Tata səkitaha mɪne Iesu Kristo sə rauvehimɪru kitaha trouəriari pehe namasanien mɪne nəmərɪnuien mik.

### *Wok sə Taetas ramo ia tənə Krit*

<sup>5</sup> Iakɪnpwəh ik ia tənə Krit mə tikəmri atukwatukw narimnari me səməme krau krɪpko mhə sampam irə. Rəmwhen iakiməni pehe tukw ik i, tikaməkeikei mevən ia rukwənu me pam muvehi utə elta me səvəi nəfwakiiən.

<sup>6</sup> Ikukurən nuvehi utəien iərmama riti trɪni mɪnuə noien səvənhi ratukwatukw pam, səvənhi pran kuatia, nɪpwnətɪn me kamhəni nɪpərhiənien ia Iesu, kɪpkɪni mhə irəha mə kəkəpwənraha riskai, uə həpwəh nɪsɪaiien tata mɪne mama səvənraha.

<sup>7</sup> Iəmə asori sə ramətui ti nakalasia me ramo tukwini nari m Kumwesən, ro iamɪnhi irə noien səvənhi traməkeikei matukwatukw pam. Rərəha mə kəkəpwə riskai, uə niemaha raməpi akwauakw in, uə ramənɪmwi pɪk, uə ramousi iərmama, uə ramo noien ikou mauvehi mane irə.

<sup>8</sup> Mətə iərmama sə rauvehi wok i traməkeikei mo iamɪnhi irə: In raməsevər ia rukwənu səvənhi ti nərmama pwɪspwɪs me. In rokeikei noien

---

**1:3:** Efes 1:9-10, Taet 2:10, 3:4, 1Tim 1:1,11    **1:4:** 2Kor 8:23, Kal 2:3, 2Tim 1:2, 4:10, Rom 1:7    **1:6:** 1Tim 3:2-7, 2Tim 2:24-26    **1:7:** 1Kor 4:1

amasan, nənə mukurən nari. In ramo noien atukwatukw mine noien sə rəmher mo ikinan i. In ramatuakəm amasan.

<sup>9</sup> In traməkeikei məkwətəmhiri əknekɪn nəgkiariien pərhiən sə kinahətən in irə. Ia noien nəha in rukurən nasituien ia nərmama, mahatən irəha ia nəgkiariien atukwatukw, mukurən mwi nəmri atukwatukwien nərmama səməme kamhəni nəgkiariien sə ropə ia nəgkiariien nəha.

<sup>10</sup> Iakani iamɪnhi irə ti nəri nə mə nərmama həpɪk kənkəpwənraha riskai. Irəha kamhəni nəgkiariien me nepwɪn nɪpwran riwən, mamheikuə ia nərmama. Pərhiən nəkur Isrel me nepwɪn nəha irəha kamho iamɪnhi irə mhəpi raka nərmama me nepwɪn. Irəha kamhəni mə tukaməkeikei kuvehi ninhum m nərmama ti nahatən penien mə irəha nərmama me səvəi Kumwesən.

<sup>11</sup> Tikərəpinhə rə ia nəgkiariien səvənraha, ti nəri nə mə irəha kamhouraha nərmama pam ia nəkwai nimwə nepwɪn, mamhahətən nərmama ia nəgkiariien sə rɪpkatukwatukw mhə mə tukahtətən. Irəha kamho mə tuhəuvehi mane irə, mhəpwəh naurisien i.

<sup>12</sup> Iəmə Krit riti kupwən in profet riti səvənraha, in mwi rɪməni iamɪnhi mə, “Nəkur Krit irəha nərmama səvəi neikuəien ia nəpɪn me pam. Irəha həmwəhen ia nəri əprɪn me. Irəha rərpaha me. Nəpɪn me irəha hokeikei mə tuhamani a nari.”

<sup>13</sup> Nəgkiariien səvəi profet nəha ro a nɪpərhiənien. Ro iamɪnhi irə tikəgkiari skai mɪnraha pwəh irəha həuvehe mhahətətə ia

nægkiariien sə ratukwatukw,

<sup>14</sup> mhəpwəh nesi penien kwənagei me səvəi nəkur Isrel mine natuakəmien me səvəi nərmama me səməme hənəpwəh nægkiariien pərhien.

<sup>15</sup> Nərmama səməme həmhər ia nəmri Kumwesən nari riti riwən sə tro irəha həuvehe mhəmkemik. Mətə nərmama səməme həmkemik ia nəmri Kumwesən ti nəri nə mə həpwəh ninien nīpərhienien ia Iesu, nənə noien riti riwən sə tro irəha həmhər. Ro iamɪnhi irə nətərigien səvənraha ramevən əpa ti nərəhaien, həreirei nəkiriien noien me.

<sup>16</sup> Irəha həni mə həukurən Kumwesən, mətə noien səvənraha ramahatən pen mə rekəm irəha həreirei in. Nərmama me nəha hərəha anan, mamhərui nəkwai Kumwesən. Irəha ko həpko mhə nari amasan riti.

## 2

*Taetas traməkeikei mahatən nægkiariien sə ratukwatukw*

<sup>1</sup> Mətə ik Taetas nægkiariien səim traməkeikei mesi pen nægkiariien kamahatən nərmama irə sə ratukwatukw.

<sup>2</sup> Tikahatən nərgharə me mə rərəha irəha nərmama səvəi nənimwiien. Irəha tuhaməkeikei mhəukurən nari, pwəh nərmama həsiai irəha. Irəha tuhaməkeikei mamhahatətə pərhien, mamhokeikei nərmama, mamhərer əknekɪn ia nəpɪn me.

<sup>3</sup> Ia noien kuatia a, tikahatən nīprənemə me mə irəha tuhaməkeikei mho noien sə ro ikinan

i rəmwhen sə Kumwesən rokeikei. Rərəha mə irəha kamhəni nīkare nərmana, uə kamhənimwi pīk nənīmwiēn skai rəmwhen ia waen. Irəha tuhaməkeikei mhahatən nəgkiariēn sə ramasan,

<sup>4</sup> mamhəvəhag m nīpran me səməme harə vi a irəha nərman mə irəha tuhaməkeikei mhokeikei səvənraha me nərman me mīne nīpwnətīnraha me.

<sup>5</sup> Irəha tuhaməkeikei mhəvəhag m nīpran me i mə irəha tuhəuvehe mho irəha nīpran me səməme həukurən nari, mhəmher, mamhətui amasan ti narimnari me fwe ia rukwənu, nənə mamhəsiai nərman me səvənraha. Nəpīn kamho noien sə ro iamīnhi, nənə, tuhərəpīnhə ia nərmana me mə tuhəpwəh nīni ərhəiēn nəgkiariēn səvəi Kumwesən.

<sup>6</sup> Ia noien kuatia a mwi, tikəgkiari amasan m ntəmaruə me mə irəha tuhaməkeikei mho narimnari me sə ramahatən pen mə irəha həukurən nari.

<sup>7</sup> Nənə ik, ia narimnari me pam, tikamo a noien sə ramasan pwəh irəha hesi pen nəfe ikamo. Nəpīn tikahatən, nīmīruēn səim traməkeikei matukwatukw mo nəgkiariēn səim rīpam mo nərmana həsiai irə.

<sup>8</sup> Tikaməkeikei mamīni a nəgkiariēn pərhiēn mə nərmana tuhəpwəh nətoniēn təkutai nəgkiariēn səim mhəni ərhə. Pwəh in tro nərmana səməme haməmwəki ik tuhauris tukwe ti nəri nə mə irəha həkətōni mhə noien ərhə riti səim, nənə, mhəpwəh nīni ərhəiēn kītaha.

<sup>9</sup> Tikahatən slef me mə irəha tuhaməkeikei mho nəkwai nəmə asori me səvənraha ia narimnari me pam pwəh rerīnraha ragiēn ti wok səvənraha. Slef

---

2:5: Efes 5:22

2:7: 1Tim 4:12, 1Tes 5:3

2:8: 1Tes 2:15

2:9:

1Tim 6:1

me tuhəpwəh niniien tai nəgkiariien səvəi nəmə asori me səvənraha,

<sup>10</sup> nənə, mhəpwəh nakresien mənraha. Mətə nəpɪn me pam irəha tuhaməkeikei mho amasan nari pwəh nəmə asori me səvənraha tuhəni nɪpərhiienien ia wok səvənraha. Noien me nəha tuho ia narimnari me pam rəmwhen mə kaməkwani pen tihinari me ia nəgkiariien səvəi Kumwesən, Kumwesən sə rauvehimɪru kitaha.

<sup>11</sup> Krau kraukurən mə namasanien səvəi Kumwesən ruvəier pehe raka ti nərmama me pam. In nəha namasanien sə rauvehimɪru nərmama irə.

<sup>12</sup> Namasanien nəha raməvəhag m kitaha mə tsəni rekəm ia noien me səməme Kumwesən ramənwəki mine noien ərəha me səvəi tiprənə i nərmama hokeikei pɪk. Ia nɪtətə i ipwet mine kitaha tsaməkeikei mharə, mamhəukurən nari, mamho noien atukwatukw mine noien me səməme Kumwesən rokeikei,

<sup>13</sup> nənə, mamhəfwini nəpɪn amasan nəha kitaha saməmri pen əknekɪn nətərigien səkitaha irə. Nəpɪn amasan nəha in nə nəpɪn sə Iesu Kristo trier pehe irə irau nɪskaiien səvənhi. Iesu nə in Kumwesən asori səkitaha rauvehimɪru kitaha.

<sup>14</sup> In rinəsəni nɪmɪruien səvənhi memhə tuku-taha mə truvehi raka kitaha ia noien ərəha me pam, nənə, məpərhi kitaha səmher mhəuvehe mho kitaha nərmama səvənhi əpa səskai ti noien amasan me.

<sup>15</sup> Narimnari me i ik tikamahatən nərmama me irə. Tikuvehi utə nətərigien səvənraha, məgkiari

---

**2:10:** Taet 1:3    **2:12:** 1Jon 2:16, Efes 1:4    **2:13:** 1Kor 1:7, Fil 3:20    **2:14:** Kal 1:4, Eks 19:5, Dut 7:6, Sam 130:8, Esik 37:23, 1Tes 2:9    **2:15:** 1Tim 4:12

mīnraha tī nīniseien noien ərəha me səvənraha. Ikauvehi nasoriien tī noien nəri i. Pwəh iərmama riti rīpko mhə nəri auər a ia niram, məpwəh mwi nətəien təkutam.

### 3

*Noien amasan me səməme Taetas traməkeikei məvəhag m nakalasia me irə*

<sup>1</sup> Taetas. Tiko a pwəh rerīnraha ramrhi mə tuhəsiai nəmə asori me mīne nərmama səməme kamhərimənu ia nīrəha. Tuhaməkeikei mho nəkwānraha, nənə mhərer mwatuk ia nəpīn me tī noien amasan me pam.

<sup>2</sup> Irəha tuhəpwəh nīni ərəhaien iərmama riti. Ia nəpīn me tuhaməkeikei mharə ia nəmərinuien, mhəpwəh nəvisəien, nənə mheiwaiu mhasitu ia nərmama me pam.

<sup>3</sup> Irəha tuhaməkeikei mho iamīnhi irə tī nəri nə mə fwe kupwən kitaha mwi səreirei nari, mamhəruī nəkwai Kumwesən. Kameikuə ia kitaha səpwəh nətəien suatuk atukwatukw. Noien ərəha me nepwīn sokeikei pik mhəregi ramasan irə kamhərimənu ia kitaha. Ia narəien səkitaha samo pik nərəhaien. Reritaha ramakres narimnari me səvəi nərmama. Kaməmwəki kitaha nənə kitaha saməmwəki kitaha me. Fwe kupwən noien səkitaha ro iamīnha irə,

<sup>4</sup> mətə Kumwesən sə rauvei pehe nīmīruīen vi m kitaha rərhi pehe namasanien mīne nokeikeien səvənhi rier pehe tukutaha.

<sup>5</sup> Ia nəpīn nəha Kumwesən ruvehimīru kitaha. Mətə in rīpkuvehimīru mhə kitaha tī nəri nə mə

samo noien amasan me, rekəm. In ruvehimiru kitaha ti nəri nə mə rapi kitaha. In ruvehimiru kitaha nəpın Nənimwın Ikinan raikuas raka noien ərəha me səkitaha, sətui mwi, mhəuvehe mhərməvi mwi.

<sup>6</sup> Kumwesən rətəgi irapw Nənimwın nəha ruvehe mukuər ia kitaha muku pen ti Iesu Kristo. Iesu nəha in iərmama sə rauvei pehe nimiruien vi m kitaha.

<sup>7</sup> In rasitu ia kitaha ia namasanien səvənhi, mo kitaha satukwatukw ia nəmri Kumwesən mə kitaha tsəuvehi nimiruien rerin sə sənəmri pen əknekın raka nətərigien səkitaha irə.

<sup>8</sup> Nəgkiariien i in nəgkiariien pərhiən. Nənə iakokeikei mə tikahətən amasan nərmama me ia narimnari me i. Pwəh nərmama səməme həməni nıpərhiəniən ia Kumwesən tuhamarə mamho noien amasan me. Narimnari me i hamasan pik mamhasitu ia nərmama.

<sup>9</sup> Mətə nəresien me nərmama həreirei nari kəmhəni, mine nəgkiariien me kəmhəni ia kwənəkwas səvəi kaha kupwən me, mine nəvisəien me kəmhəvisə mınraha me ti nıpwrai Loa səvəi Moses, tikaməkeikei mərəer isipwın ti nırəha, ti nəri nə mə ko həpkasitu mhə, namasanien səvənraha riwən.

<sup>10</sup> Trini mınuə iərmama riti rini nəgkiariien iamınhi meitehi kımiaha irə, tikevən mınise. Mə ro mwi iamınhi, nənə, tikevən mınise mwi. Trini mınuə ikınise m kəru, mətə raməkeikei ia noien səvənhi, nənə, tikərəer pen isipwın tukwe, məpwəh.

<sup>11</sup> Ikukurən mə iərmama sə ramo iamınhi



irə, in iəmə rərəha, mamō noien ərəha. Noien səvənhi ramo pui atukw a in mə in iərmama riti Kumwesən trərpwɪn noien ərəha səvənhi.

*Nəgkiariien sampam səvəi Pol*

<sup>12</sup> Takərhi pehe iərman mi i riti Atemas uə Tikikas truvehe mətoni ik. Nəpɪn truvehe irə, tikaməkeikei mətoni akwauakw a suatuk mə tikuvehe mətoni iou fwe taon nəha Nikopolis, tɪ nəri nə mə iou iakokeikei mə takevən marə fwe ikɪn ia nəpɪn səvəi nəkwieiiien.

<sup>13</sup> Iərmama mi kəru nəghɪnrau nə Apolos mine Sinas, Sinas in iərmama riti sə ramowok ia nɪkaren səvəi loa səvəi nəkur Rom, irau krauavən ia navənien səvənrau, mətə tikasitu ia nirau mə nari riti trəpwəh niwən təniiien ia nirau.

<sup>14</sup> Ramasan mə ikahatən nərmama me səkitaha mə irəha tuharə mamhəmwur mamho noien amasan me mamhasitu ia nərmama nepwɪn səməme narimnari me səvənraha rɪpkəmwhen mhə. Rərəha mə nərmama me səkitaha tuhamarə auər a.

<sup>15</sup> Nərmama me pam səməme kamharə kɪmaha mɪnraha həni ramasan tukw ik. Nənə ik tikɪni tukwini ramasan səkɪmaha revən tɪ nərmama me səməme hokeikei kɪmaha mamhahatətə ia Iesu.

Pwəh namasanien tramarə tukumiaha pam.

---

**3:12:** Efes 6:21-22    **3:13:** Wok Me 18:24, 1Kor 3:5-6, 1Kor 16:12

**3:14:** Efes 4:28, Taet 2:14, Mat 7:19

**Nəkukuə Ikinan**  
**The New Testament in the Nafe (Kwamera) language**  
**of Southeast Tanna, TAFEA Province, Vanuatu**  
**Niutestamen long lanwis Nafe blong Vanuatu.**  
**Le Nouveau Testament dans la langue Nafe de**  
**Vanuatu.**

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

---

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416